

四庫全書

經部

欽定四庫全書

論語類考卷十六

明 陳士元 撰

飲食考

醯

朱子曰醯醋也

元按周禮有醯人掌五齊七菹註云齊菹須醯而成
集韻云醯酸味也釋名云醯苦酒也六經無醋字讀

漢書始見

醬

馬融氏曰魚膾非芥醬不食

朱子曰食肉用醬各有所宜

元按內則云濡豚包苦實麥濡雞醢醬實麥濡魚卵

醬實麥濡鼈醢醬實麥說文云醬醢也集韻云醬醢

也周禮膳夫云凡王之饋食醬用百有二十壘註云

醬謂醢醢也今人則謂醢為醋不謂醬為醢矣風俗

通云雷不作醬世謂令人腹內雷聲王充論衡云作
豆醬惡聞雷欲人急作不欲積久也太平御覽云子
路感雷精而生尚鬪好勇死衛人醢之孔子覆醢每
聞雷心惻怛耳是又以醢即醬也

祭肉

元按祭肉謂之胙左傳云宰孔賜齊侯胙史記云天
子賜楚成王胙是也胙亦謂之福說文云胙祭福肉
也穀梁云胙致福肉也周禮膳夫凡祭祀之致福者

受而膳之註云致福謂進祭祀之餘肉故左傳謂申
生致胙於公而國語則謂致福於公是福即胙也祭
於公君廟之胙也朋友之饋家廟之胙也朋友且拜
則拜公胙可知胙肉生曰脰熟曰膳孟子云膳肉不
至謂熟胙也

腥

朱子曰腥生肉

元按生肉有腥氣故謂之腥少儀云切葱若薤實之

醢以柔之註云殺腥氣也周禮庖人秋行犢麋膳膏
腥註云膏腥雞膏也此特論因時煎和之法然凡肉
之生者皆謂之腥不獨牛羊雞魚而已又飲食之穢
者亦皆謂之腥書云庶羣自酒腥聞在上是也又郭
璞註爾雅云飯中有腥謂有生米也

膾

朱子曰牛羊與魚之腥聶而切之為膾

元按朱子之言出少儀鄭玄註云聶之為言腓也先

藿葉切之復報切之則成膾又孔穎達郊特牲疏云
先腠而大臠切之然後報切之金履祥云報切之者
再橫切也詩云烹鼈膾鯉內則云大夫燕食有膾無
脯有脯無膾言不得兼用也

魚餒

朱子曰魚爛曰餒

元按爾雅魚謂之餒郭璞云餒內爛也春秋僖公十
九年梁亡公羊傳云梁亡魚爛而亡也何休云梁君

隆刑峻法百姓一旦相率俱去狀若魚爛魚爛從內發也

肉敗

朱子曰肉腐曰敗

元按爾雅云肉謂之敗郭璞云敗臭壞也說文云敗毀也集韻云敗破也故兵陣外破者曰敗肉謂之壞者腐自外入也

肉味

元按說文云味滋味也味有五酸鹹甘苦辛周禮瘍醫云以酸養骨以辛養筋以鹹養脉以苦養氣以甘養肉是也

市脯

元按禮記云牛脩鹿脯田豕脯麋脯麇脯鄭玄註云脯析乾肉也東方朔云乾肉為脯周禮腊人掌乾肉凡脯腊之事註云薄析曰脯夫脯為薄析之乾肉則朱子釋束脩以為脯者非也

沽酒

元按周禮酒正掌酒之政令以式法授酒材辨五齊之名一曰泛齊二曰醴齊三曰盎齊四曰緹齊五曰沈齊辨三酒之物一曰事酒二曰昔酒三曰清酒月令云乃命大酋秫稻必齊麴蘖必時湛熾必絜水泉必香陶器必良火齊必得酒經云空桑穢飯醞以稷麥以成醇醪酒之始也烏梅女醯甜醪九投澄清百品酒之終也沽酒集註以沽為買然鄭玄註酒正職

卷十六
云既有米麴之數又有功沽之巧孔穎達疏云功沽
謂善惡是酒之善者為功惡者為沽也或曰酒以久
為貴周禮昔酒取其久也一宿曰宿再宿曰沽沽酒
是再宿之酒耳

食精

朱子曰食飯也精鑿也

元按春秋運斗樞云粟五變而烝飯可食呂氏春秋
云飯之羨者玄山之禾不周之粟陽山之糴南海之

柘闕津九章云粟飯五十糲飯七十稗飯五十粳飯
四十八御飯四十二風土記云精折米十取七八朱
子謂精為鑿鑿與粳同說文云糲米一斛舂九斗為
粳釋名云糲一斛舂八斗精米也則精粳異矣

薑食

朱子曰薑通神明去穢惡故不撤

元按內則云楂菜薑桂又云屑桂與薑以洒諸上是
薑為庶羞之所必用者孔安國云齊禁葷物薑辛而

不臭故不去夫雖齊亦不去則常食之有薑可知史
繩祖學齋佔畢云王介甫問不徹薑食之義於劉貢
甫貢甫善詭隨對曰本草薑多食令人損智智者過
於道孔子以道教人故勸人食薑以愚其智耳其意
蓋戲介甫之鑿於經學也朱子詠薑詩曰薑云能損
心此謗誰與雪請誦去穢功神明看朝徹自註云本
草載薑久食去臭氣通神明或云傷心氣不可多食
者非也古人格物之學一草一木無不精到如此

蔬食

朱子曰蔬食麤飯也

元按集韻云蔬粗也故朱子以蔬食為粗飯韓子云
孫叔敖為令尹糲飯菜羹晏子春秋云晏子相齊食
脫粟飯是也又孔安國云蔬食菜食也蔬疏古字通
用何春孟云蔬食乃乏米以蔬充食不但無肉耳東
觀漢記趙孝建武初穀食少孝夫婦嘗蔬食而以穀
食陰讓弟禮夫婦禮覺亦不肯食遂共蔬食是蔬食

者非穀食矣論孟蔬食之云蓋如此

菜羹

元按爾雅云肉謂之羹郭璞云肉臠也邢昺云肉臠者儀禮所謂腳臠臠是也廣雅云羹謂之湑詩云毛魚載羹左傳云潁谷封人食舍肉曰小人有母未嘗君之羹戰國策云羊羹不徧是古人以肉為羹也羹食自諸侯至庶人無等今云菜羹者以菜為羹如肉則所謂毛羹晉史所謂葍羹也孔子厄於陳蔡七日

不食藜藿不糝蓋藜藿以米汁糝之不糝者未成羹也史記云堯有天下菜糲之食藜藿之羹是也

饋

元按篇海云饋餉也凡以物遺人謂之饋如饋藥饋車馬是也進食亦謂之饋周禮內饗選百羞以俟饋禮記云主人親饋則拜而食是也又庖厨亦謂之饋易云在中饋是也歸孔子豚魯論語歸作饋

盛饌

朱子曰饌飲食之也

元按弟子以酒食饌先生者常禮也主人以盛饌供賓者隆禮也凡主人侍食於長者則親為之饋既有盛饌則親饋可知曲禮云主人親饋則拜而食主人不親饋則不拜而食註云饋進饌也孔子見盛饌必變色而作朱子以為敬主人之禮者謂其親饋耳

亞飯 三飯 四飯

朱子曰亞飯以下以樂侑食之官

元按周禮春官大司樂王大食三侑皆令奏鍾鼓白
虎通云王者平旦食晝食晡食暮食凡四飯諸侯三
飯大夫再飯馮奇之云天子諸侯皆以樂侑食每食
樂章各異各有樂師朱子云諸侯三飯故魯之樂師
自亞飯以下蓋三飯也愚謂不然亞次也亞飯之後
有三飯四飯則亞飯之前必有初飯矣使魯止於三
飯則於禮樂未甚僭也樂師又何以他適乎蓋古者
天子一日四飯魯用天子禮樂亦一日四飯所謂于

繚缺者乃各飯時作樂備食之官不言初飯者或主
初飯之官不他適耳

變食

朱子曰變食謂不飲酒不如葷

元按不飲酒不如葷之說出莊子葷者辛臭蒜屬葷
且不茹則他物可知此孔子謹齊之事愚嘗因是歎
釋氏齊素之不經也釋氏以三五九月為三長月故
奉佛者不飲酒不如葷其說云天帝以大寶鏡輪照

四天下寅午戌月正臨南贍部州故當食素以徼福
官司謂之斷月俗又謂之惡月士大夫赴官者輒避
之或又謂唐時藩鎮蒞事必大享軍屠殺羊豕甚多
故不欲以其月蒞任他官則不爾也晉書禮志云穆
帝納后不用九月為忌月北齊書云高洋謀篡魏其
臣宋景業言宜以仲夏受禪或稱五月不可入官犯
之終於其位景業曰王為天子無復下期豈得不終
於其位乎然則正五九之忌月相承已久竟不曉其

義何所取事起何時

車乘考

殷輅

馬融氏曰殷車曰大輅

朱子曰商輅木輅也輅者大車之名古者以木為車而已至商而有輅之名蓋始異其制也周人飾以金玉則過侈而易敗不若商輅之朴素渾堅而等威已辨為質而得其中也

元按路輅古字通用正義云路訓大也君之所在以大為號門曰路門寢曰路寢車曰路車是也註左傳者謂車行之道路故以路名之謬矣若然則門寢之制豈亦行於道路乎通典云有虞氏因彤車而制鸞車夏后氏因鸞車而制鈎車殷因鈎車而制大路周因殷路而制五路周禮春官巾車掌王之五路一曰玉路錫樊纓十有再就二曰金路鈎樊纓九就三曰象路朱樊纓七就四曰革路龍勒條纓五就五曰木路前樊鵠纓又

王后亦有五路重翟錫面朱總厭翟勒面績總安車
彫面鷲總翟車貝面組總輦車組鞅而孔子所謂殷
輅蓋即周之木路也革路鞅而漆木路漆而不鞅錫
在顛鈎在額朱者勒之色龍者勒之飾樊纓以組為
之與冠纓同五采一匝為就錫也鈎也朱也龍勒也
玉金象革四路皆有之木路則質而已尚書顧命云
大輅在賓階面綴輅在阼階面先輅在左塾之前次
輅在右塾之前註云大路玉輅也綴輅金輅也先輅

象輅也次輅革輅木輅也蓋周以玉輅為大輅而殷之大輅則木而已左傳云大路越席昭其儉也服虔以大路為木路而杜預則以大路為玉路蓋不知玉路乃周之大路而非殷之大路也明堂位云大路殷路也註云大路木路漢祭天乘殷之路謂之桑根車是已禮器云大路繁纓一就先路三就次路五就註云大路殷祭天之車也殷尚質無別彫飾乘以祭天謂之大路殷有三路先路次路大路也然諸侯有先路次

路亦有大路樂記云大輅天子之輅所以贈諸侯雜
記亦云諸侯之賵有乘黃大路相隧以後路註云後
路次路也蓋周之天子大路乃玉路而諸侯之大路
則金路非殷之木路也左傳鄭以先路三命之服賜
子展以次路再命之服賜子產魯以先路三命之服
賜晉三帥以一命之服賜司馬與師又僖公二十八
年王賜晉文公以大路之服定公四年祝鮀言先王
分魯衛晉以大路襄公十九年王賜鄭子僑以大路

二十四年王賜叔孫豹以大路杜預謂賜魯衛晉之
大路皆金路賜穆叔子僑之大路當是革木二路也

輓 軌 衡

包咸氏曰大車牛車輓者轅端橫木以縛輓小車駟
馬車軌者轅端上曲鈎衡又曰衡輓也

朱子曰大車謂平地任載之車輓轅端橫木縛輓以
駕牛者小車謂田車兵車乘車軌轅端上曲鈎衡以
駕馬者

元按易云服牛乘馬是古者駕車或以牛或以馬也
大車之轅直小車之轅曲轅者鈎衡木也轅端橫木
端猶前也轅前橫木謂衡也衡亦謂之軛詩箋云車
前曲木上鈎衡者謂之軛軛即轅也轅前有軛謂曲
木以駕牛肩而聯於橫木也小車謂田車兵車乘車
據周禮註則田車木路兵車革路乘車金路玉路象
路然巾車所掌之服車有五皆可謂之乘車也吳伯
章云轅長一丈四尺四寸平居輿下曲其末而上鈎

於衡衡下缺去七寸以扼馬領使不得出謂之軛其
軛之平處謂之衡衡與軛一木也轅所以鉤而就之
耳

式立

邢昺氏曰式者車上之橫木男子立乘有所敬則俯
而憑式遂以式為敬名

朱子曰式車前橫木有所敬則俯而憑之

元按式與軛同古者乘車皆立惟老人與婦人坐乘

耳然馬驟車馳有難於立故於車上橫立高木五尺
五寸謂之較使乘車者依之以立焉或遇有所敬則
當鞠躬故又橫一木高三尺三寸在較下謂之式有
敬則俯躬而憑之又於式上橫一木二尺二寸謂之
較詩云倚重較兮是已考工記云輿人為車參分其
隧一在前二在後以掇其式又云以其廣之半為之
式崇又云參分軫圍去一以為式圍註云兵車之式
深尺四寸三分寸之二其田車乘車皆與兵車之式

同而曲禮則云兵車不式註云尚威武不崇敬也豈
兵車戰時撤其式乎抑車式尚存而武人無所用式
乎

執綏

邢昺氏曰綏者挽以上車之索也

元按曲禮云馭車馬者執策綏又云僕展軫效駕奮
衣由右上取貳綏又云君出就車則僕并轡授綏又
云凡僕人之禮必授人綏註云取貳綏者貳副也綏

登車索綏有二一是正綏擬君之升一是副綏擬僕右之升故僕振衣畢取綏一副而升也并轡授綏者謂以六轡及策并置一手中以一空手取正綏授與君令登車也凡僕人之禮必授人綏者謂為人僕必授綏與所升之人也少儀云以散綏升執轡註云散綏副綏也檀弓云魯莊公及宋人戰于乘丘馬驚敗績公墜佐車授綏註云戎車之貳曰佐授綏乘公也又詩云淑旗綏章箋云綏所引登車也此所謂綏即

孔子升車所執之綏也然綏之取義不一明堂位云
綏謂大麾旌旄之屬詩云福履綏之箋云綏安也所
謂綏之斯來亦取安義左傳文公十二年秦晉出戰
交綏註云未致爭而兩退曰綏司馬法所謂將軍死
綏是也曲禮云武車綏旌註云綏謂垂舒之也曲禮又
云大夫則綏之註云綏下也此所謂綏皆與升車之
綏不同

車中

包咸氏曰車中不內顧者前視不過衡軛旁視不過
轆轤

元按曲禮云車上不廣效不妄指立視五雋式視馬
尾顧不過轂註云雋猶規也謂輪轉之度蓋車輪一
周為一規乘車之輪高六尺四寸徑一圍三總一規
為一丈九尺八寸五規為九丈九尺六尺為十六步
半則在車上得視前十六步半也而包邢謂前視不過
衡軛與曲禮異矣不內顧者即禮所謂顧不過轂也

轂居輪之中輪有三十幅周圍轆之外裏以革內置鐵轄而軸橫其中謂之轂孔頴達云轉頭不得過轂過轂則掩後人私是也不疾言不親指者即禮所謂不廣教不妄指也車中不內顧古論語作車中內顧執輿

朱子曰執輿執轡在車也蓋本子路御而執轡令下問津故夫子代之也

元按爾雅轡首謂之革郭璞云轡鞞勒也又字林云

鞮轡革也是轡首即革耳古者乘車駕四馬凡八轡
詩云執轡如組孔安國氏云御者執轡於此使馬騁
於彼朱子云轡今之韁也執轡乃僕御之事子適衛
冉有僕故知此本子路御而執轡孔子代之也執轡
而長沮曰執輿之疾徐在轡之操縱執者收攝在
手之義執輿謂執轡止輿以待子路之間津也

論語類考卷十六

欽定四庫全書

論語類考卷十七

明 陳士元 撰

冠服考

周冕

邢昺氏曰冕者冠之別號世本云黃帝作冕宋仲子云冕冠之有旒者禮文殘缺形制難詳周禮弁師掌王之五冕皆玄冕朱裏止言玄朱而已不言所用之

物子罕篇云麻冕禮也蓋以木為幹而用布衣之上
玄下朱取天地之色其長短廣狹則經傳無文阮諶
三禮圖漢禮器制度云冕制皆長尺六寸廣八寸天
子以下皆同沈引董巴輿服制云廣七寸長尺二寸
應劭漢官儀云廣七寸長八寸沈又云廣八寸長尺
六寸者天子之冕廣七寸長尺二寸者諸侯之冕廣
七寸長八寸者大夫之冕但古禮殘缺未知孰是司
馬彪漢書輿服志云孝明帝永平二年初台有司采

周官禮記尚書之文制冕皆前圓後方朱裏玄上前垂四寸後垂三寸天子白玉珠十二旒三公諸侯青玉珠七旒卿大夫黑玉珠五旒皆有前無後此則漢法耳其古禮鄭玄註弁師云天子衮冕十二旒鷩冕九旒毳冕七旒希冕五旒玄冕三旒旒各十二玉公之衮冕九旒九玉侯伯七旒七玉子男五旒五玉孤三旒三玉大夫二旒二玉謂之冕者冕俛也以其後高前下有俛俯之形故名冕焉欲其位彌高而志彌

下也

朱子曰周冕有五祭服之冠也冠上有覆前後有旒黃帝以來蓋已有之而制度儀等至周始備

元按周禮司服云掌王之吉凶衣服王之吉服祀昊天上帝則服大裘而冕祀五帝亦如之享先王則衮冕享先公享射則鷩冕祀四望山川則毳冕祭社稷五祀則希冕羣祭小祀則玄冕註云衮卷龍衣也其衣五章裳四章鷩冕禕衣也其衣四章裳三章毳冕

屬衣也其衣三章裳二章希冕刺粉米無畫也其衣
無文惟刺黻而已又弁師云掌王之五冕皆玄冕朱
裏延紐五采繅十有二就皆五采玉十有二玉笄朱
紘諸侯之繅旂九就璫玉三采其餘如王之事繅旂
皆就玉瑱玉笄諸侯及孤卿大夫之冕各以其等為
之註云繅雜文之名合五采絲為之繩垂於延之前
後玉藻所謂前後邃延是也衮衣之冕十二旂則用
玉二百八十八鷩衣之冕繅九旂用玉二百一十六

毳衣之冕七旒用玉一百六十八布衣之冕五旒用
玉一百二十玄衣之冕三旒用玉七十二諸侯及孤
卿大夫之冕各以其等者繅旒如其命數也侯伯繅
七就用玉九十八子男繅五就用玉五十繅玉皆三
采孤繅四就用玉三十二三命之卿繅三就用玉十
八再命之大夫繅再就用玉八繅玉皆朱綠又禮記
云天子為藉冕而朱絃諸侯為藉冕而青絃謂之絃
者以一組繫於左筭遶頤而上屬於右筭垂餘以為

之飾陳祥道所謂冕約之以武設之以紐貫之以笄
固之以紘是也虞書有日月星辰山龍華蟲藻火粉
米黼黻絺繡之十二章故通典云虞備十二章夏殷
相襲不變而鄭玄註周禮冕服惟有九章其三辰則
登於旗何其說之異也夫自堯舜垂衣裳至周而儀
章日著孔子於四代禮樂特曰服周之冕取其文物
之備尊卑有辨也豈虞備十二章而周乃惟有九章
乎又謂上公冕服九章而王服亦九章何以別上下

也郊特牲云祭之日王被袞以象天則十二章備矣而鄭玄則謂日月星辰之章乃魯禮也豈周制止九章而魯反有十二章乎鄭註之難據如此

黻冕

邢昺氏曰祭服謂之黻其他謂之鞞俱以章為之制同而色異鞞各從裳色黻之色皆赤尊卑以淺深為異天子純朱諸侯黃朱大夫赤而已大夫以上冕服皆有黻故稱禹黻冕左傳云晉侯以黻冕命士會蓋

黻制雖同而冕制有尊卑耳周禮五冕孤之服自希冕而下則晉侯以黻冕命士會者當是希冕也朱子曰黻蔽膝也以韋為之冕冠也皆祭服也

元按黻與鞞制同而名異禮記作黻易作紱詩作芾記云有虞氏服鞞夏后氏山殷火周龍章鞞君朱大夫素士爵韋一命緼鞞幽衡再命赤鞞幽衡三命赤服葱衡蓋鞞之色因乎裳而記謂君朱大夫素士爵韋者皆祭服之鞞也君祭以冕服冕服朱衣纁裳故

朱鞞大夫祭以朝服緇衣素裳故素鞞士祭以玄端
玄端則雜裳可也故爵鞞周禮典命公侯伯之士一
命而士之助祭以爵弁爵弁纁裳故緇鞞所謂一命
緇鞞是也公侯伯之卿三命大夫再命而鄉大夫助
祭以玄冕玄冕纁裳故赤鞞所謂再命三命亦鞞是
也鞞之為物以其第前則曰鞞以其一巾足矣則曰
鞞以色則曰緇以緇之質則曰鞞鞞蓋古人稱舊草
為茅蒐讀茅蒐之音為鞞鞞乃舊所染故稱鞞鞞

也士冠禮於皮弁玄端皆言鞞特於爵弁言鞞鞞詩
於素鞞言鞞於朱弁赤弁乃言弁是鞞者弁之通稱
而弁與鞞鞞異其名所以尊祭服也君鞞以朱而諸
侯朝王則赤赤弁在股赤弁金爲是也弁與鞞同易
之朱紱方來困於赤紱是也采芑言方叔之將兵鞞
亦以朱瞻彼洛矣言作六師而鞞以鞞鞞蓋兵事服
章弁章弁緹裳故貴者以朱鞞卑者以鞞鞞也左傳
云袞冕黻珽疏云黻鞞同制也禮書云鞞長三尺以

象三才頸五寸以象五行下廣二尺以象地上廣一尺以象天天子之鞞直其會龍火與山諸侯前後方其會火與山大夫前方後挫角其會山而已鄭玄謂山取其仁火取其明龍取其變惟天子備焉然則邢昺所謂尊卑黻制相同謬矣孔子稱禹致美乎黻冕先言黻者黻之制在冕之先也詩云常服黼皐註云黼黼裳也黼皐猶言黼冕也禹之黻冕雖無所考見然曰致美則比唐虞之禮有加但不如周冕之文盛

耳王制云有虞氏皇而祭深衣而養老夏后氏收而祭燕衣而養老殷人哂而祭縞衣而養老周人冕而祭玄衣而養老郊特牲云委積周道也章甫殷道也母追夏后氏之道也周弁殷哂夏收是收者禹之弁名而母追乃禹之冠名也

麻冕

朱子曰麻冕緇布冠也以三十升布為之

許謙氏曰冕冠總名冕名五衣鷩毳希玄天子諸侯

公卿大夫士朝祭用之五冕有九等其十二旒次九旒下至二旒為八等與十二旒共九等天子用十二旒及九七五三共五等自九旒以下各以其命數服之冕弁冠皆首服也冕冠皆以緇布為之集註以冕為緇布冠亦總名也

元按古者冠制有三曰冕曰弁曰冠冕者朝祭之服所謂十二旒九旒而下者是也惟有位者得服之弁亞於冕所謂周弁殷哱夏收是也冠亞於弁所謂委

貌章甫毋追是也弁與冠自天子至於士皆可服焉
夏殷之祭用弁蓋未嘗以弁亞於冕也而周制始以
冕弁定尊卑之分庶人以冠士以弁不得服冕大夫
雖可服冕而私家之祭則不敢用是冕與冠異也而
集註以冕為緇布冠者何也邢昺云冠者首服之大
名冕者冠中之別號胡祖義云冕冠上板也緇布染
布為赤黑色故謂冕為緇布冠麻冕績麻為布以為
冕記云大古冠布齊則緇之蓋古人不輕於蠶繅以

布為重但以粗細色素為吉凶以縷數為差等八十縷為一升升者登也登者成也禮朝服十五升布冠倍之吉服冠冕最貴故以三十升極細之布為之漢食貨志云周布帛廣二尺二寸為幅朱子謂古尺一幅闊二尺二寸如深衣用十五升布已似今之極細絹古尺短於今尺若再盡十五升是又加一千二百縷則一幅當不止二尺二寸蓋以周尺之二尺二寸容二千四百縷一寸計一百九縷程子謂周尺當今

尺五寸五分弱則今尺之一寸計縷幾二百是一寸當為百筴此所以細密難成不如用絲之省約絲謂之純者絲之始縑素質未染故曰純也中古吉服雖用絲然猶以布為貴故冠冕皆用布書云王麻冕黼裳鄉士邦君麻冕蟻裳太保太史太宗皆麻冕彤裳是也至孔子時或有為純冕者其用功省約而可從故孔子服周之冕者尚其等儀之辨而純冕從衆者取其儉不廢禮也

冕衣裳

朱子曰冕冠也衣上服裳下服冕而衣裳貴者之盛服也

元按說文云冕大夫以上冠也夫冕雖卿大夫可服然服之亦有其時卿大夫服冕以朝及服冕以助祭其次則受遺奉冊服之書謂一人冕執鉞之類是也非此三者不得服冕雖私家奉祀亦不過服皮弁而已冕之旒衣裳之章皆視命數以為隆殺不敢越也

通典云上古衣毛後世以麻易之先制其衣後制其裳黃帝堯舜垂衣裳蓋取諸乾坤故衣玄而裳黃觀
暈翟草木之華乃染五色始為文章以表貴賤而天
下理此衣裳之始也子見冕衣裳者雖少必作過之
必趨其當朝祭之會而未為魯大夫之時乎魯論語
冕作弁鄭玄註云魯讀弁為統

玄冠

朱子曰喪主素吉主玄

元按雜記云委武玄縞而後蕤註云玄玄冠也凡禮家稱玄端者玄謂玄冠端謂朝服惟玉藻所謂天子玄端而朝日于東門之外諸侯玄端以祭乃指玄冕而言其餘玄端皆謂玄冠朝服也特牲饋食禮云主人冠玄冠又士冠禮云主人玄冠朝服註云玄冠委貌也委貌周冠名周語云晉侯端委以入武宮是晉侯亦服玄冠也玉藻又云玄冠朱組纓天子之齊冠也玄冠丹組纓諸侯之齊冠也玄冠綦組纓士之齊

冠也孔子羔裘玄冠不以弔李日華謂羔裘朝服玄冠祭服竊謂古者冬裘夏葛冬之朝服先服羔裘必用緇布衣為裼裼衣之上始服玄端之衣與玄冠相配君臣視朝皆用之若祭用朝服則冬服亦當有羔裘矣是羔裘亦可以為祭服而玄冠亦可以為朝服但朝祭俱吉服故不以弔也周禮司服云凡弔事弁經服註云弁經者如爵弁而素加環經經大如總之經其服錫練總練疑練諸侯及卿大夫亦以錫練為弔

服又喪服小記云諸侯吊必皮弁錫練而喪服舊說則以士吊服素委貌冠朝服非也素委貌乃庶人吊服而士當用弁經疑練變其裳以素耳國君於其臣弁經他國之臣則皮弁大夫士有朋友之恩亦弁經也集註喪主素所謂素者如檀弓奠以素器之素言無文采也然吊祭之服其袂侈制與常服不同非謂以白素為吊服而已

章甫

朱子曰章甫禮冠

元按郊特牲云章甫殷道也註云道者常所服以行道之冠蓋周曰委貌殷曰章甫夏曰毋追毋追一作牟堆長七寸高四寸廣五寸後廣二寸制如覆盂前高廣後卑銳章甫高四寸半後廣四寸前櫛周之委貌蓋亦損益乎章甫之制章者明也甫者丈夫之稱言冠所以表明丈夫也故公西赤服之而為相是周人而用殷冠也輔廣云章甫緇布冠也與毋追委貌相

此皆以漆布為之是三代之冠不甚相遠也孔子殷人也居宋章甫者其亦思殷道也夫

端

邢昺氏曰鄭玄云端玄端諸侯日視朝之服蓋其衣正幅染之玄色故曰玄端王制云周人玄服而養老註云玄衣素裳天子之燕服為諸侯朝服彼云玄衣即此云玄端也若以素為裳即是朝服此朝服素裳皆得謂之玄端故鄭云端玄端諸侯朝服若上士以

玄為裳中士以黃為裳下士以雜色為裳天子諸侯以朱為裳則皆謂之玄端不得名朝服也

元按周禮司服言諸侯孤卿大夫士之服而繼之以齊服有玄端素端則玄端素端非特士之齊服而已鄭玄云端者取其正也蓋士之衣袂皆二尺二寸而屬幅是廣袞等也其祛尺二寸大夫以上侈之侈之者蓋半而益一則其袂三尺三寸祛尺八寸然謂之端則衣袂與祛廣袞等矣無大夫士之辨也果士之

袪殺於袂尺非端也大夫之袪侈以半而益一亦非
端也故深衣之袂圍長衣之袂長帛祭及餘衣之袪
侈則玄端之袂必端許謙氏云端衣名也布幅二尺
二寸此衣身長二尺二寸袂亦二尺二寸而屬幅謂
袖接一幅也整齊端正故謂之端是也古者端衣或
配以冕或配以冠玉藻云天子玄端而朝日于東門
之外大戴記云武王端冕而受丹書樂記云魏文侯
端冕而聽古樂荀卿云端衣玄裳統而來路此配以

冕者也冠禮云冠者玄端緇布冠既冠易服服玄冠
玄端左傳云劉定公端委以治民又云晏平仲端委
以立於虎門晉語云董安于端委以隨宰人周語晉
侯端委以入武宮此配以冠者也夫周禮謂玄端為
齊服然諸侯與士又以為祭服玉藻云諸侯玄端以
祭特牲饋食禮云主人冠端玄是也大夫士又以為
私朝之服玉藻云朝玄端夕深衣是也天子至士又
以為燕服玉藻云天子卒食玄端而居內則云子事

父母冠綏纓端鞞紳是也鄉大夫士又以為朝服其
視齊祭之玄端特易其裳耳凡為擯相者當服朝服
聘禮云使者朝服帥衆介是也故公西赤云端章甫
願為小相而陳祥道乃云齊祭之服尚玄若朝服則
天子以素諸侯以緇未聞以玄端也其意蓋據儀禮
云大夫祭以朝服士祭以玄端冠禮云主人朝服則
冠服玄端雜記云公襲朝服一玄端一皆以朝服與
玄端並言故謂玄端非朝服也蓋不知齊祭之玄端

上衣下裳俱用玄非齊祭則其玄端乃衣玄而裳不
必玄也朝服之衣用玄端而尊卑以裳別豈可謂玄
端非朝服而不可以擯相也哉

朝服

孔安國氏曰朝服皮弁服

元按孔氏以朝服為皮弁服者士冠禮云皮弁服素
積緇帶素鞞鄭註云此臣與君視朔之服也故孔氏
以皮弁為吉月之朝服然鄭註又云皮弁者以白鹿

皮為冠也皮弁之衣用布十五升其色象馬又素衣麕裘為視朔之服是冠與衣之色俱白矣周禮司服云視朝則皮弁服凡甸冠弁服註云皮弁之衣用緇布而裳則積素以象皮弁耳此又與素衣麕裘裳不合也弁師云王之皮弁會五采玉璣象邸玉笄諸侯及孤卿大夫之韋弁皮弁各以其等為之註云韋弁皮弁侯伯璣飾七子男璣飾五玉皆三采孤璣飾四五命之卿璣飾三再命之大夫璣飾二玉皆二采此

皮弁之制也記云天子與其臣皮弁以日視朝諸侯
與其臣皮弁以朔視朝朝服以日視朝郊特牲云三王
共皮弁素積祭儀云君皮弁素積以巡牲又云君皮
弁素積卜三宮之夫人世婦使入於蠶室又云大學
始教皮弁祭菜然則皮弁之服豈但施於視朔而已
哉蓋皮弁乃天子至士通用之服以儀禮士冠士喪
考之則皮弁之上有爵弁以周禮司服考之則皮弁
之上有韋弁但不如皮弁之用為多也孔子於吉月

必朝服而朝者蓋致仕不忘其君而孔邢俱以朝服
為皮弁服其或以魯君不視朔乃服視朔之服以存
禮也乎若夫因君視疾加朝服拖紳者乃玄端常朝
之服因鄉人儺而朝服立阼階者乃祭服耳蓋大夫
祭以朝服冠以皮弁服祭服以存室神也

帷裳


王肅氏曰衣必有殺縫唯帷裳無也

朱子曰朝祭之服裳用正幅如帷要有袷積而旁無

殺縫其餘若深衣要半下齊倍要則無袷積而有殺縫矣

元按釋名云帷圍也廣雅云帷幕帳也朝祭之服上衣必有殺縫在下之裳其制正幅如帷名曰帷裳則無殺縫其餘服制如深衣之類必有殺縫故喪服之制裳內削幅註云削猶殺也輔廣云禮服取其方正故裳用正幅而人身之要為小故於要之兩旁為袷積即今衣摺也陳傅良云深衣之裳以布六幅斜裁

為十二幅三分之一在上三分之二二在下要狹齊闊
要不用劈積而旁有斜裁之殺縫殺也者謂要殺於
齊一半也



論語類考卷十七

欽定四庫全書

經部
論語類考卷

二十八至
三十

詳校官給事中臣戴璐

刑部郎中臣許兆椿覆勘

總校官知縣臣楊懋珩

校對官助教臣卜維吉

謄錄監生臣袁瑩

欽定四庫全書

論語類考卷十八

明 陳士元 撰

冠服考 第二

紳帶

邢昺氏曰以帶束腰垂其餘以為飾謂之紳

朱子曰紳大帶之垂者

陳祥道氏曰玉藻天子素帶朱裏終辟諸侯素帶終辟

大夫素帶辟垂士練帶率下辟并紐約用組三寸長齊於帶紳長制士三尺有司二尺五寸大夫大帶四寸雜帶君朱綠大夫玄華士緇辟二寸再繚四寸凡帶有率無箴功辟猶冠裳之辟積也率縫合之也天子諸侯大帶終辟則竟帶之身辟之大夫辟其垂士辟其下而已雜飾也飾帶君朱綠大夫玄華士緇故儀禮士冠主人朝服緇帶冠者爵弁皮弁緇布冠皆緇帶則士帶練而飾以緇也士辟下二寸則所辟其下端二寸也再繚四寸則

結處再繚屈之四寸也天子至士帶皆合帛為之或以素或以練或終辟或辟垂或辟下具飾或朱綠或玄華蓋素得於自然練成於人功終辟則所辟者備辟垂辟下則所積者少朱者正陽之色綠者少陽之雜玄與緇者陰之體華者文之成天子體陽而兼乎下故朱裏而裨以朱綠諸侯雖體陽而不兼乎上故飾以朱綠而不朱裏大夫體陰而有文故飾以玄華士則體陰而已故飾以緇然於大夫言帶廣四寸則其上可知而士不必四寸

於士言紳三尺則其上可知而有司止於二尺五寸也凡帶有率無箴功則帶緯而已無刺繡之功也以至并紐約組三寸再繚四寸紳鞞結三齊皆天子至士所同也夫所束長於飾則失之太拘所飾長於束則失之太文紳鞞結三齊然後為稱則有司之約鞞蓋亦長二尺五寸也古者於物言華則五色備矣於文稱凡則衆禮該矣鄭氏以華為黃以凡帶為有司之帶以率為士與有司之帶以辟為鞞以二寸為士

帶廣大夫以上用合帛士以下禪而不合皆非經據
之論也

元按古人之帶二有革帶有皮為之用
以懸佩亦以繫鞞在裳之上衣之內易云鞞帶內則
云男鞞革玉藻云革帶博二寸士喪禮云鞞帶搢笏
左傳云鞞厲游纓揚子云綉其悅鞞是也既服革帶
然後於衣上加以大帶大帶以繒為之圍於腰結於
前其兩頭垂在下者曰紳即今深衣之帶詩云垂帶

而厲毛萇杜預皆以厲為帶之垂者是也玉藻子游
曰參分帶下紳居一焉紳鞞結三齊註云紳謂紳帶
鞞謂蔽膝結謂約紐餘組三者俱長三尺故為三齊
也革帶與鞞其用相因則革帶之色當與鞞同而大
帶施於衣上其朝祭常服之制及君臣貴賤之等必
有不同也故公西赤之束帶立朝與孔子之朝服拖
紳皆朝服之帶而子張所書之紳非居士之錦帶則
弟子之縞帶耳

佩

朱子曰君子無故玉不去身觿礪之屬亦皆佩也

許謙氏曰凡佩有德佩有事佩德佩則有珺璠玕璫
衝牙玉藻云古之君子必佩玉無故玉不去身君子
於玉比德焉天子佩白玉而玄組綬公侯佩山玄玉
而朱組綬大夫佩水蒼玉而純組綬世子佩瑜玉而
綦組綬士佩璫玟而緼組綬凡帶必有佩玉唯喪否
若事佩則如內則所謂左佩紛帨刀礪小觿金燧右

佩玦捍管遶大觶木燧是也紛悅拭物之中也刀礪
小刀及礪石也小觶解小結大觶解大結狀如錐銳
以象骨為之金燧取火於日木燧所以鑽火玦發弦
者也捍拾也管筆彊遶刀鞞也玉藻又云孔子佩象
環五寸而綦組綬鹽鐵論云子思銀佩

元按釋名去佩倍也言其非一物有倍二也君子居
喪則去佩君在不佩玉左結佩右設佩居則設佩朝
則結佩齊則績結佩而爵鞞去喪則無所不佩詩云

雜佩是也其制上有折衝下有雙璜中有琚瑀下有衝牙貫之以組綬納之以蠙珠而其色有白蒼赤之辨其聲有角徵宮羽之應其行有采齊肆夏之節其象有仁智禮樂忠信道德之備故非僻之心無自入也然古制佩綬長短無所考見漢制貴者綬長三尺二寸卑者綬長三尺佩之綬曰綬所以貫玉也蓋與紳相比矣豈古制亦若此與

紺緞飾

邢昺氏曰紺玄色緹淺絳色孔氏云一入曰緹按考
工記云三入為纁五入為緹七入為緇註云染纁者
三入而成又再染以黑則為緹緹今俗作爵言如爵
頭色也又復再染以黑乃成緇矣鄭司農謂爾雅云
一染謂之纁再染謂之窳三染謂之纁凡玄色者在
緹緇之間其六入者與今孔氏云一入曰緹未知何
據又云緹者三年練服則似讀緹為纁按檀弓云練
衣黃裏纁緣註云小祥練冠練中衣以黃為內纁為

飾喪服也又云紺為齊服盛色者說文云紺帛深青揚赤色是紺為青赤色齊服也皆不可為領袖緣飾朱子曰紺深青揚赤色齊服也緹絳色三年之喪以飾練服者飾領緣也

許謙氏曰按諸書言染色一入曰縗再入曰覲三入曰纁四入曰朱五入曰緋六入曰玄玄即紺也七入曰緇經所謂不以紺緋飾者則齊用玄衣已明緋在朱玄之間則自赤漸變黑者但不知此色本為何用

而決非飾練之縑矣

元按爾雅云一染謂之縑再染謂之窳三染謂之縑
此三者皆以丹汁染之也考工記云三入為纁五入
為緋七入為緇夫爾雅與考工記皆不言四入六入
之色然士冠禮有朱紘之文鄭註云朱則四入者是
更以纁入赤汁而為朱也淮南子云以涅染紺則黑
於涅涅即黑色也纁若入赤汁則為朱若不入赤汁
而入黑汁則為紺矣若更以此紺入黑汁則為緋所

謂五入為緌是也紺緌相類之色若更以此緌入黑
汁則為玄是六入為玄故士冠禮註亦云玄六入也
更以此玄入黑汁則為緇是七入而為緇玄緇亦相
類之色故禮家每以緇布衣為玄端也然則紺蓋四
入之色而邢氏許氏以玄即紺似謬

寢衣

孔融氏曰今之被也

朱子曰齊主於敬不可解衣而寢又不可著明衣而

寢故別有寢衣其半蓋以覆足

元按齊寢不以衾致嚴也謂之寢衣其制或與衣相類但長半以覆足可寢而不可行專為齊之寢衣而已豈可以為今之被哉

衿締綌

朱子曰衿單也葛之精者曰締麤者曰綌表而出之謂先著裏衣表締綌而出之於外欲其不見體也詩所謂蒙彼綌締是也

元按鄘風君子偕老章瑳兮瑳兮其之展也蒙彼綯
締是紕袷也註云蒙覆也綯締締之蹙蹙者當暑之
服也以展衣蒙締綯而為之紕袷所以自斂飾也夫
展衣者禮衣也禮衣蒙於締衣之上則締衣之內必
有中衣以表締衣也綯乃麤葛而綯締則葛之極細
靡者然論語表締綯締綯在外也詩蒙綯締綯締在
內也說文云衿玄服也若以締綯染為玄服即當為
表不宜別有禮衣以蒙之矣

緇衣羔裘

邢昺氏曰中衣外表其色皆相稱緇衣羔裘謂朝服也

朱子曰緇黑色羔裘用黑羊皮

元按朱子謂衣以裼裘欲其相稱以單衣加裘上而見其羔曰裼以全衣蒙之曰襲古者衣裳不欲其文之著故裼以單衣故曰裘之裼也見羔服之襲也充羔不文飾不裼是也舊註以羔裘為朝服詩鄭風云

羔裘如濡註云羔裘大夫服也檜風云羔裘逍遙註
云緇衣羔裘諸侯之朝服唐風云羔裘豹祛註云君
純羔大夫以豹飾也夫鄭風唐風以羔裘刺在位之
臣而檜風則大夫賦羔衣以憂其君者是羔裘乃君
臣視朝之通服也又鄭風緇衣註云緇衣卿大夫居
私朝之服蓋卿大夫朝君畢則退而去朝服惟著羔
裘上之緇衣也又周禮司裘云掌大裘以共王祀天
之服註云大裘黑羔裘玉藻云羔裘豹飾緇衣以裼

之註云卿大夫助祭於君之服是緇衣羔裘又為祭服矣

素衣麤裘

邢昺氏曰此在國視朔之服也卿大夫士皆然其受外國聘享亦素衣麤裘

朱子曰麤鹿子色白

元按聘禮疏云諸侯與其臣視朔及行聘禮皆服麤裘但君之麤裘以麤為裘臣則不敢純如君用青豸

袞其裼衣君臣亦有異若在國視朔君臣同素衣為裼若聘禮君臣同用麕裘但主君用素衣為裼使臣則用絞衣為裼然君臣視朔既可以同裼而行聘獨不可以同裼乎玉藻註云絞蒼黃之色則非可以稱麕色矣孔子素衣麕裘蓋用以朝朔而非行聘也玉藻麕作麕而聘禮註引論語亦作麕裘按韻書麕與麕俱訓鹿子豈義固可相通與

黃衣狐裘

邢昺氏曰此大蜡息民之祭服人君以歲事成熟搜索羣神而報祭之謂之大蜡又臘祭先祖五祀因令民得大飲農事休息謂之息民於大蜡之後作息民之祭其時則有黃衣狐裘也大蜡之祭與息民異息民用黃衣狐裘大蜡則皮弁素服以其大蜡之後始作息民之祭息民大蜡同月其事相次故連言之耳郊特牲云蜡也者索也歲十二月合聚萬物而索饗之也皮弁素服而祭是大蜡之祭用素服也郊特牲

又云黃衣黃冠而祭息田夫也註云祭謂既蜡臘先
祖五祀也於是勞農以休息之事息民之祭用黃衣
也

元按玉藻云狐裘黃衣以裼之註云黃衣大蜡時臘
先祖之服也郊特牲既云皮弁素服而祭蜡矣又云
黃衣黃冠而祭以息田夫是蜡祭之後始為息民之
祭息民臘先祖五祀故謂之臘祭是黃衣乃臘祭之
服也月令云孟冬祈來年于天宗割祀於公社又云

臘先祖五祀夫祈與臘不同然則皮弁素服而祭祀
來年於天宗者蜡祭也黃衣黃冠而祭臘先祖五祀者
臘祭也蜡以息老臘以息民周蜡於十二月即夏正
建亥之月左傳晉侯以十二月滅虢遂襲虞宮之奇
曰虞不臘矣是臘與蜡同月也然蔡邕獨斷乃云夏
曰嘉平殷曰清祀周曰大蜡漢曰臘鄭玄註月令臘
先祖五祀乃云此周禮所謂蜡也故註論語者遂以
黃衣狐裘為大蜡息民之祭服豈知蜡臘祭服不同

哉自秦以建丑之月為臘而後世因之遂謂衰曰臘
昧先王息民之禮矣

褻裘

邢昺氏曰此私家所著之裘也

元按許慎說文入聲系部有結字註引論語云結衣
長短右袂又五音篇海結與褻義不同結堅結也褻
私服也然結褻同音皆思列切豈慎為音同而誤書
耶夫慎在東漢與馬融鄭玄輩不甚相先後而融玄

註論語皆作褻裘不知慎何以獨作結衣也

狐貉之厚

邢昺氏曰狐貉之厚以居謂在家接賓客之裘也

朱子曰狐貉毛深溫厚私居取其適體

元按豳風云一之日于貉取彼狐狸為公子裘毛萋
傳引狐貉之厚以居為證鄭玄註云于貉往搏貉以
自為裘也狐狸以共尊者夫書傳多言狐裘而未嘗
言貉裘據豳人取狐狸為公子裘取貉自為裘豈非

貉賤而狐貴乎說文云狐有三德其色中和小前後
大死則首丘

敝緼袍

朱子曰敝壞也緼臬著也袍衣有著者也

元按玉藻云纁為繭緼為袍鄭玄註云繭袍衣有著
之異名也纁謂今之新綿緼謂今纁及舊絮也是緼
袍者乃以纁與舊絮為之非臬著也臬牡麻也臬著
者用臬極細以當綿而著於袷衣之中也孔安國謂

緼為臬著是異於玉藻之緼袍矣蓋因其與衣狐貉者立故云緼為臬著以見其貧而不恥也說文云袍繭也註引論語云衣弊緼袍而弊敝字不同

褻服

朱子曰紅紫間色不正且近於婦人女子之服也褻服私居服也言此則不以為朝祭之服可知又曰青黃赤白黑五方之正色也綠紅碧紫騮五方之間色也蓋以木之青克土之黃合青黃而成綠為東方之

間色以金之白克木之青合青白而成碧為西方之
間色以火之赤克金之白合赤白而成紅為南方之
間色以水之黑克火之赤合赤黑而成紫為北方之
間色以上之黃克水之黑合黑黃而成駟為中央之
間色

元按齊夢龍云後世朝祭服綠服紫服緋制度服色
盡變於拓跋魏杜佑云以紫緋綠青為命服倣於隋
帝巡游之時而其制遂定於唐然夏侯勝謂取青紫

如拾地芥楊雄謂紆青拖紫則漢時貴官之服已尚青紫非始於魏與隋也今考漢制百官服玄無服青紫者豈漢時章服尚玄而青紫乃貴官燕居之服非微賤者可得服耶不然何勝雄之致羨也夫謂紅紫不以為褻服則當時褻服或有用紅紫者而孔子獨不用耳紅紫間色禮記註作姦色

攝齊

朱子曰攝摳也齊衣下縫也禮將升堂兩手摳衣使

去地尺恐躡之而傾跌失容也

元按曲禮云兩手摳衣去齊尺鄭玄註云齊裳下緝也蓋衣裳對言則上為衣下為裳偏言衣則可以兼裳記謂摳衣者乃摳裳也提挈裳齊使去地一尺則可升階無顛仆之患集註以齊為衣下縫然齊實裳下縫也

齊衰

邢昺氏曰言齊衰則斬衰從可知也

朱子曰齊衰喪服

元按喪服有五斬衰齊衰大小功緦麻是也惟斬衰二者謂之衰其制同但緝不緝異耳喪服重極於斬衰其次莫如齊衰然齊衰服有三年杖期不杖期五月三月之異用布則粗細不同凡喪服上曰衰下曰裳五服皆同惟於斬衰二服稱衰者以其用布當心長六寸博四寸謂之衰此斬衰齊衰所由稱也儀禮喪服篇載齊衰之制疏衰裳齊牡麻經冠布纓削杖

布帶疏屨三年者期者不杖麻屨者無受者子夏傳
云齊者何緝也牡麻者象麻也疏屨者蕉蒯之菲也
齊衰之經斬衰之帶也大功之經齊衰之帶也喪服
又云凡衰外削幅裳內削幅幅三衽齊衰四升其冠
七升以其冠為受受冠八升註云齊衰正服五升其
冠八升義服六升其冠九升也視斬衰三升冠六升
粗細有間矣

凶服

孔安國氏曰凶服送死之衣物

元按凶服說者多以為居喪之服是與上文齊衰相似故集註但云哀有喪而不明言為何凶服也孔氏以為送死之衣物即士喪禮所謂斂衾角柶君隧庶隧鬻笄弁帶布巾掩練瑱纊幘緇握決綦絢襲衣散衣之屬與雜記所謂子羔之襲魯人之贈皆凶服之類也或曰凶服者式之式負版者謂斬衰齊衰之服後有負版孔子式凶服式其有負版者耳此說載於

玉唾壺與舊註異

襁

朱子曰襁織縷為之以約小兒於背者

元按包咸云負者以器曰襁然襁字從衣非器也博物志云襁織縷為之廣八寸長二尺以約小兒於背上邢昺疏云長丈二尺

左衽

朱子曰衽衣衿也被髮左衽夷狄之俗也

元按衽有二義一為衽席之衽禮記云請衽何趾又云玉府衽席儀禮云御衽於奧中庸云衽金革是也故朱子中庸集註云衽席也然衽從衣而以為席者蓋席緣以帛耳其一為襟衽之衽史云楚必斂衽而朝又云連衽成帷與此左衽是也衽本衣衿然集韻以衽為裳際而通義又以衿為衣帶俱非蓋衿與襟同襟胷衣也中夏胷衣掩幅向右惟夷俗向左故謂之左衽

論語類考卷十八